



14. august 2017

UKA 2017/127

Inatsisartut suleriaasiat § 33 immikkoortoq 1 naapertorlugu matumuuna inatsisartunut aalajangiiffigisassatut siunnersuut imaattoq saqqummiuppara.

Naalakkersuisut kingusinnerpaamik UKA 2018-mut ileqqussaasunik siunnersuisooqatigiinnik pilersitsinissamut siunnersuisooqullugu Inatsisartut aalajangiiffigisassaattut siunnersuut.

(Inatsisartunut ilaasortaq Bendt B. Kristiansen, Inuit Ataqatigiit)

Tunggavilersuut:

Inuiaqatigiit ineriartornitsinni ileqqorissaarnermik oqariartuuteqartarnerit ulluinnarni inuttut pissuserissumik ataqqinnittumillu avatagiisitsinnut pissuseqartussaansinnik tunggaviliisussaasut kinguaariit nikittarneranni allanngoraluttuinnarnerat oqallisaasarpoq.

Ileqqussaasut eqqortut suuppat, kialuuna ilusilersugassarigai? Isumaqarnarpoq oqallinnikkut inuiaqatigiit tamanna ilusilersussagaat.

Inuiaqatigiinni kinguaariit nikittarnerini ileqqut assigiinngittut katakkaluttuinnarneqartut uparuarneqartarpoq, isumaqarnarporlu inuiaqatigiit akornitsinni ileqqussaasut pillugit oqallinnissamut piffissanngortoq. Ileqqussaasut pillugit qallinnerit partiit ataasiakkaat oqariartuutaattut nalilerneqarsinnaasuusanngittut Inuit Ataqatigiit isumaqarpugut. Partiit ataasiakkaat ileqqussaasunik taasaminnik oqaaqjissarisartillugit parti-nut ataasiakkaanut tapersersuisuunngittut siunertamut akerlilersuisinnaasarnerat ilisimaaraarput, naak immaqa siunertaq immiini pittaasuusinnaagaluartoq.

Ileqqussaasut eqqartornerini inuttut pissuserput kisiat pinnagu aammali inuiaqatigiittut naleqartitatta ersarissarnissaat, ammip qalipaataa apeqqutaatinnagu akaareqatigiinneq, peqqissutsimut tunggassuteqartut, ilisimatuuussutikkut ineriartornermi killiffik (bioetik) pillugit siunnersuisooqatigiit suliaqarsinnaassasut takorloornarpoq.

Siunnersuisooqatigiit sulinerminni inoqammut ataqqinninneq naleqartumillu takutitsineq tunggavigissagaat kissaatiginartupilussuuvoq, pingaartumik inuup inunngoqqaarnerani piffissaq siulleq toqullu tungaanut ingerlanermini piffissaq kingulleq ataqqilluinnarlugit pissusilersortussaannikkut.

Siunnersuisooqatigiit sammisassaataa tassaassapput apeqqutit ileqqorissaarnermut tunggasut imaluunniit apeqqutit Kalaallit Nunaanni inuiaqatigiinnut peqqissutsimullu tunggasut attuumassteqartulluunniit, tassunga ilanngullugit Aana apeqqutit inatsiseqarnermut tunggasut. Siunnersuisooqatigiit aamma Naalakkersuisunik, Inatsisartunik pisortatullu oqartussaasunik apequtinut ileqqorissaarnermut tunggasunut siunnersuisuusassapput.

Siunnersuisooqatigiit ileqqorissaarnermi ajornartorsiutinut attuumasunut unammillernartunullu inuiaqatigiit atugaannut paasisitsiniaanernik oqallitsitsinernillu isumaginnissapput. Siunnersuisooqatigiit tamanik ineriartorneq, suliarfik apeqqutillu ileqqorissaarnermut tunggasut tamanut oqallisissiansanngortitat pillugit ilisimatitsisassapput. Siunnersuisooqatigiit apequtinik immikkut ittunik paasiniaanerni tamanut tusarniaanernik ingerlatsisinnaapput, suleqatigiisitamik [il.il.](#) pilersitsillutik.

Siunnersuisooqatigiit qulingiluanik ilaasortaqaassapput. Siulittaasup Naalakkersuisunit toqqarneqartartussap saniatigut inuit ilisimasaqarfinit makkuninngaanneersut toqqarneqartassapput:

- 1) Ilaasortaqaq ataaseq meeqqanut, inuusuttunut ilaqutaariinnullu ilisimasani aallaavigalugit toqqarneqartassaaq
- 2) Ilaasortaqaq ataaseq ilinniartitaanermut tunngasunik ilisimasani aallaavigalugit toqqarneqartassaaq
- 3) Ilaasortaqaq ataaseq utoqqarnut tunngasunik ilisimasani aallaavigalugit toqqarneqartassaaq
- 4) Ilaasortaqaq ataaseq innarluutilinnut tunngasunik ilisimasani aallaavigalugit toqqarneqartassaaq
- 5) Ilaasortaqaq ataaseq isumaginninnikkut ilinniagaqarnini inuiaqatigiillu pissusaanut tunngasunik ilisimasani aallaavigalugit toqqarneqartassaaq
- 6) Ilaasortaqaq ataaseq peqqinnissamut tunngasunik ilinniagaqarnini inuiaqatigiillu pissusaannut tunngasunik ilisimasaqarnini aallaavigalugit toqqarneqartassaaq
- 7) Ilaasortaqaq ataaseq inuuniarnermnut anersaamullu pissutsinik ilisimasaqarnini aallaavigalugit toqqarneqartassaaq
- 8) Ilaasortaqaq ataaseq kulturinstitution eqqumiitsuliornermullu tunngasunik ilisimasaqarnini aallaavigalugit toqqarneqartassaaq

Pisortanut aningaasatigut allaffissornikkullu kingunerisassat.

Suliassami pissutsit assigiingittut ataqatigiissartariaqarneri attuumassuteqartussaasullu peqataatinneqartariaqarneri pequtugalugit naatsorsuutigineqarpoq suliap aallarnisaataasumik ilusilersornera siunnersuutissatullu suliarinera ukiup ataatsip missaanik sivilissuseqarumaartoq. Naatorsuutigineqarpoq inatsisiliornissap suliarinera ataatsimut isigalugu A/C fuldmægtig-ip ataatsip ukioq ataatsimut sulisinneranik naleqassasoq, aningaasartuutit kr. 500.000,-.

Inatsisissatut siunnersuutip naammassilluni ilusilernerani aningaasatigut allaffissornikkullu kingunissai nassuiarneqarumaarput. Kalaallit ileqqussaasunik siunnersuisooqatigiivisa suliassaata aammalu katitigaanerata qanoq ikkumaarnerata ersarissarneqanngikkallarnerani aalajangiiffigineqanngikkallarneranilu nassuiassallugu ajornakusoorpoq ileqqussanik siunnersuisooqatigiinnik pilersitsinermi ataatsimoortumik aammalu ingerlaavartumik aningaasatigut allaffissornikkullu kinguneriumaagai qanoq ikkumaarnerisut. Politik-ikkut aalajangerneq naggataagut tunngaviliisuujumaarpoq. Ersarissarneqassooq Aningaasaqarnermut Siunnersuisooqatigiinnut ukiumut kr. 1 mio. illikartinneqartarmata, taamatuttaaq Naligiisitaanermut Siunnersuisooqatigiinnut aamma Inuit Piginnaatitaaffiinnut Kalaallit Nunaanni Siunnersuisooqatigiinnut. Kalaallit Nunaanni Ileqqussanik Siunnersuisooqatigiinnik pilersitsinissaq ukioq 2019-mit ukiumut kr. 900.000,-nik Namminersorlutik Oqartussanut aningaasartuutaasarumaartoq mianersortumik eqqoriarneqarsinnaavoq.

Namminersorluni inuussutissarsiuteqarnermut aningaasatigut allaffissornikkullu kingunerisassat.

Suliarineqarnerani suliffeqarfinnut namminersortunut sunniuteqassanngilaq.

Innuttaasunut aningaasatigut allaffissornikkullu kingunerisassat.

Ilusilersorneqarnerata nalaani innuttaasunut sunniuteqarnaviannngilaq.